

Finalmente decision a cai **Minister Refunjol lo bira definitivamente Gobernador di Aruba**

ORANJESTAD - Informacion cu nos a obtene ta indica cu definitivamente decision a cai cu minister actual di Enseñansa, Fredis Refunjol lo bira nos proximo Gobernador. Aunke e noticia aki no ta ningun sorpresa ya cu minister Renfunjol tabata e unico candidato cu a ser presenta pa ocupa e cargo importante aki, y e tabata conta cu sosten unanimo di tur fraccion representa den parlamento y di gobierno naturalmente. Sin embargo su nombramento oficial a sufri algun impasse, ora cu e noticia aki a ser divulga despues cu lidernan di tur fraccion den parlamento y Gobierno a reuni pa sostene unanimamente e nomber di minister Refunjol como candidato unico pa bira Gobernador di Aruba. E hecho aki a trece algun mal comprendemento na Hulanda, manera e propio Minister Presidente Nelson Oduber a confirma luna pasa den un

conferencia di prensa, pero definitivamente e impasse aki a ser clarifica y soluciona caba. Den mesun conferencia aki, e prome mandatario a informa cu e periodo di e actual Gobernador mr. Olindo Koolman cu mester a baha na inicio di e aña aki, a ser prolonga temporalmente pa seis luna. Kiermen tur cos ta indica cu eventualmente na inicio di luna di juni minister Refunjol lo asumi oficialmente como Gobernador di Aruba, sin embargo ta wordo spera cu pronto Gobierno lo bai haci e anuncio oficial aki, y lo suministra mas informacion pa pueblo. Un pregunta cu sigur lo haya contesta den e dianan benidero lo ta kende lo ocupa e puesto di minister Fredis Refunjol. Den pasado a core e rumor cu e parlamentario Kenneth Jong lo bira nos proximo minister di Enseñansa, sin embargo e rumor aki no a haya ningun base for di seno di gobierno mes.

Bon Dia Aruba. - (diahuebs 11 maart 2004)